



Œuvres de R. Benoit

14 Comédies théâtrales :

Lou Fer à Chavau.

Lous pas Bilous.

L'Amour deicimo tout.

Lous Cussounats.

La Terro nurricièro.

Malaude per sa vacho.

Lou Parasor de la Roso.

Lous dous Chassaieis.

Mo de fer, mito de roun-
zeis.

La Noço de la Suzèto.

L'Arbitrage.

Lous Einousilhaieis.

Clautrucat.

L'eisagne.

et 50 Poésies

et Contes du Périgord

en six recueils.



Roubert BENOIT

Felibre majourau
President d'ou Bournat d'ou Périgord

Édiciu Populàrio

Lous Cussounats

Coumédio en dous ateis, boueirado de chants

avec
Musique, chant, etc.



VII

LA DIFFUSION FÉLIBRÉENNE
Société d'édition et de diffusion
des Œuvres des Grands Félibres Méridionaux
Siège Social : LES LÈCHES (Dordogne)

1929

IMPRIMERIE R. MARTINET, av. Gambetta, MUSSIDAN

Lous Cussounats

Pito Coumédio en dous ateis boueirado de chants

per ROUBERT BENOIT



Musico per dous chansous, de René CHATÈU

(La Musico ei à la fi).

(Uno cousino de campagno : Bufet, taulo, chadièras, eidièro, uno selho d'aigo e la couado; l'eisseujo-mo pingolho à coutal.)

PERSOUNAGEIS :

La Lisbet, la Blasilho,

Servilhou, Marsau, Setième, Pitit-Jan, Piquèto, Piarou, Jantou

PRUMIÉ ATE

SCENO I

(Lisbet, un balai à la mo, bouèisso la chambro.)

SCENO II

LISBET, SERVILHOU, SETIÈME

(Servilhou rentro segut de soun drole Setième. Talèu rentrat, Setième se sièto, un tros de bouei à la mo e fai 'no baudufo em soun coutèu.)

SERVILHOU. — E bè, mas, mancavo noumas co d'aqui aurò. Mas nou, nou, co se farò pas.

Imp. Martinet, Mussidan. 1929

12

LISBET. — Que qu'ei qu'as ? Ar l'er risent coumo un rounzenié.

SERVILHOU. — Ai que vène, de vèire lou regent; e coumo li disio que notre Setième restarió em n'autreis per trabalhâ à parti de las vacansas, ah ! ma paubro, a fait brave !

LISBET. — E qu'a dit ?

SERVILHOU. — A dit !... a dit que lou Setième èro, trop intelligent e qu'àvio uno trop bouno coumprenaduro per trabalhâ la terro; que lou foulio leissâ à l'eicolo !

LISBET. — A belèu rasou. Vendrò regent à soun tour aubetout empluiat dins-t-un burèn.

SERVILHOU. — O, mas en memo tems que iou, Jan, lou faure, notre vesí, i'a dit tabè que soun drole, lou Jantounet, chabarió de nâ à l'eicolo à la fi de l'annado per fi de restâ emd èu à la forjo. E bè quete cop i'a reipoundut : Es rasou, moun Jan, gardas vòtre drole, ne fai rè à l'eicolo, qu'ei 'no lauveto e fas bien de li balhâ un meitié !

LISBET. — E bè si pod rè fâ à l'eicolo, lou regent a gut rasou.

SERVILHOU. — Mas t'assegure que i'ai parlat, iou, au regent.

LISBET. — E que i'as-tu reipoundut ?

SERVILHOU. — I'ai dit : Leidoum, pensas que i'a noumas lous ascis que poden trabalhâ la terre aubetout fâ un meitié ? E creses que n'en fau pas de la coumprenaduro per traçâ uno bravo rejo, per bien poudâ las vits ? Creses que lou peisan n'a pas dous us cops besoun d'eicrire uno letro e de tenei sous counteis ? E creses que fau èsse sot per bien farrâ un parei de biòus ?

LISBET. — Qu'ei 'gau, tout parié, si m'i àvio noumas dous faureis, quante tu ses malaud sirias bien privat de pas vèire lou medeci.

SERVILHOU (*un bri eimalit*). — E tu n'auras jamai besoun de medeci quand siras malaudo, qu'ei lou veterinari que vendrò.

LISBET (*s'eibrasseiant*). — Lous medecis dous alimaus valen bè miei que lous autreis, maisei que souagnen e que garissen ça que i'a de melhour sur queto terro : las bêtias !

SERVILHOU. — E bè ! as rasou : fau dous medecis e dous veterinaris; mas si me coupas tout lou tems n'achabaraï pas de te dire ça qu'ai reipoundut au regent.

LISBET. — E bè, parlo, te couperai pus.

SERVILHOU. — I'ai dit : Dòus sabents n'en fau plo, car is fan lou grand renom dòu païs, is fan chaque jour de las trobas miraudiousias que boten generousamen au service de l'Umanitat. E memo, parei que tornen inventà ça que s'èro perdut e que counaissian lous anciens; provo que la rodo viro sens pauso e que jous l'arcèu que nous capèlo qu'ei toujours la memo chauso que torno coumensâ. Mas n'ia segur pas besoun d'avei la tète escultado e d'èsse un sabent de prumièro per fâ bien soun meitié. E vous pàrie, Moussu lou regent, que n'i a mai d'un de quís sabents, memo naut jucats, que crebarian de fam si n'au-treis n'eram pas qui per lous fâ viure.

Mas ei segur que fau nâ à l'eicolo. Fau bien sabeï legi e countâ. Fau counèisse l'istòrio de soun païs. E si, ma fè, un ne sàbio pas finamen ça que s'ei passat dins l'ancien tems quand, eici, n'i àvio noumas de la sauvagino, m'ei devis qu'un droulichou dèu aprène en prumié soun istèrio loucalo. E si quaucaré de marcant s'ei passat dins lous ranvers, dèu zou sabeï.

Si, meinage, zou sab, à soun tour zou countarò à sous efants, e quand un eitrangié vendrò emperaqui (e, Diu marce, ne manquen pas, aurò, lous visitours, em tous qui chavaus de fer que fan lou vai e lou vè sur las routas dòu païs), lou droulichou, au lec de s'enfugì quand un lou sono, vendrò, content e fier, dire ça que sab. E l'un veirò entau que lous efants de Franso, si soun pas tous dòus sabents, soun pas, tout parié, dòus einoucents. E coumo fau touto espèço de mounde per fâ un mounde, tout nirò bien.

Pessaque, Moussu lou regent, i'aurò tabè dòus aseis ! Mai n'en troubares segur tant d'un coutat coumo de l'autre. Ne manquen pas mai dins lous qu'an segut l'eicolo jusqu'à la quincaro lo que dins lous que n'an pas deïpassat lou prumié barancou.

LISBET. — Servilhou ! Servilhou ! M'ei devis, tout parié, que ses un pau fadard. A t'auvi, dirian, per ma fè, que ses uno mirando. E co n'ei pas tout à fè co, n'en sabe plo quaucaré.

SERVILHOU (*eimalit*). — Tu, te vole pas reipoundre. Ne ses jamai countèto de rè. Ah ! las fennas, las fennas ! (*balho uno roumado*).

LISBET (*en s'eicharnt*). — Las fennas valen miei que v'autreis, que ses tous dòus penlans. Mas pènsè que lou regent t'a parlat à soun tour ?

SERVILHOU. — O plo, que m'a parlat, e m'a dit : « Servilhou, ne coumprenes rè à tout acò. »

— Co se pod, i'ai iou reipoundut, mas n'empaicho que si vous eicoutavem tout notre païs sirió poplat de sabents; e co sirió, leidoun, veses-vous, coumo si n'i àvio rè noumas dòus riches. Lous sabents ne s'òcuparian que de sabentarias, lous ri-

cheis passarian lur tems à badâ lou bec e degun pus ne voudriô trabalhâ la terro ni aprêne un meitié.

E, dijas-me, moussu lou regent, lou toupî, qui qu'ei que lou fariô buli ?

LISBET. — Co siriô enquêro iou, pardi, pessaque sei plo seguro que m'as pas coumtado demei lous richeis !

SERVILHOU. — Enfin, per achabâ, i'ai dit au regent : N'ia prou d'un dins la familho, veses-vous. Quand moun einat, lou Marsau, tournet dôu service e que fuguet maridat, troubet que la terro èro trop basso per la sarclâ e, à touto forço, vouguet tournâ à la vilo.

E bè, e bè, que n'en diséis-tu, Lisbet, creséis-tu que co vai miei per notre fi e per n'autreis tabè ?

LISBET. — Ah ! lou Marsau, vèu, n'èro pàs un sabent, sàbio bien legi e veiqui tout; mas, pamens, a troubat uno bouno plaço.

SERVILHOU. — Uno bouno plaço, o, qu'ei vrai; mas quand a tout paiat e qu'ei restat barrat touto la journado, que n'a vis lou cèu noumas per un feneitrou, n'a pas soun boursi uflat ni l'ertouma santous.

LISBET. — O, mas sa fenno, la Blasilho, notro noro, porto chapèu, a leissat qui sa coueifo, soun coulet e sous soucs; e, ma fè, a l'er d'uno damo.

(Setième, pendent la parladuro de soûs parents, ei restat ôcupat à se talhâ uno baudufo em soun coutèu dins-t-un tros de bouei.)

SERVILHOU (à Setième). — Vèire, tu, Setième, que n'en diséis de tout acò ?

SETIÈME (que n'a pas lachat sa baudufo). — N'en dise, n'en dise rè.

SERVILHOU. — Coumo n'en diséis rè. Eimas-tu miei trabalhâ la terro aubetout damourâ à l'eicolo ?

SETIÈME. — Iou eimariô miei fâ lou pus eisat.

SERVILHOU. — Lou pus eisat ? Mas lou pus eisat per tu ei de damourâ em n'autreis e de trabalhâ coumo iou.

SETIÈME. — Co se pod, mas qu'ei penable.

SETIÈME (*chanto*)

L'ERBO FOLO

1^{er} COUPLET

Iou n'aime pas ça qu'ei penable
E ne sabe bri que chausi,
Lou trabai de terro ei guissable
E lou soulei fai negresi (*bis*).

Recoursou

Sei pamens soubrat de l'eicolo,
De las leissous e dous devèis. (*bis*)
Iou voudriò coumo l'erbo folo } *bis*
Poudei froujâ en de lesei. }

2^e COUPLET

N'aime pas me foulâ la rato,
Aime miei viure sens rè fâ,
E poudei, coumo notro chato,
Dedins la quèirio me chauffâ (*bis*).

(Recoursou)

3^e COUPLET

M'eivedelâ quand tout trabalho,
Vèire lous autreis s'eirenâ;
Bien minjâ e, gras coumo calho,
Per degeri me permenâ (*bis*).

(Recoursou)

SERVILHOU (*li balhò un cop de ped dins las fessas*). — Tè,
masso co ! Ah ! voleis rè fâ ! E per minjâ, coumo faras ?

SETIÈME. — E bè, vendrai qui minjâ la soupo.

SERVILHOU (*li cour après, mas lou Setième s'enfiu*). — Vole
pas nurri un fegnant.

SCENO III

LISBET, SERVILHOU

LISBET. — Quèn drole ei couqui coumo Baseri.

SERVILHOU. — E ne vau pas un pilot de peselasso.

Fio-te qui,
Trapo alhours

(A quèu moumen, chanten dins la basso-cour)

Qui li pourtarò lou dinâ (bis)
Au bouié de laurado
E pin e pan e ra pa ta pan
Au bouié de laurado.

SERVILHOU. — Ah ! veiqui lous bous gouiats, notreis vesis, que se fan pas de bilo.

(Tuten à la porto.)

SERVILHOU (*crêdo*). — Entras ! (*Entren : Piarou, Piquêto e Pitit-Jan. Setième rentro lou darnié.*)

SCENO IV

SERVILHOU, LISBET, PIAROU, PIQUÊTO, PITIT-JAN, SETIÈME

PITIT-JAN. — E bè, coumo co vai eici ?

SERVILHOU. — Co vai, co vai pas dòu tout. Veiqui pas que notre Setième vòu fâ, aurò, mens que soun frai ! Lou Marsau ei partit per la vilo e, là-bas, li trabalhò ; mas lou Setième vòu rè fâ dòu tout.

PITIT-JAN (*trapo Setième per uno aurelho*). — Ah ! volèis rè fâ ? E bè, iou vau tè trabalhâ las fessas em moun soulié.

SETIÈME (*que crêdo*). — Anè, leissas-me. E d'abord, co vous aregado pas !

PITIT-JAN (*lou lacho*). — Pito chanilho, vai !

LISBET (*trapo lou Setième*). — Ah ! volèis rè fâ ? E bè, trapo co (*li balho un chataurethat*).

PIAROU. — Vèire, qu'ei pas lou tout, soum venguts vous trouba pessaque volem, n'autreis tabè, mountâ un sendicat.

PIQUÊTO. — Tout lou mounde aurò mounto un sendicat, e iou m'ei devis que devem fâ de memo.

LISBET. — Un sendicat ! Zòu vole bè, mas vole, tabè, que las fennas li sian, pessaque v'autreis fas noumas parlâ e bèure quante ses acampats e qu'ei tout.

PITIT-JAN. — E bè co, parlam-n'en ! Vostro lengo, ma Lisbet, n'a pas besoun d'oulivâ e n'i a pas de mouli que vire ta-bè.

SERVILHOU. — Pitit-Jan, laissez la Lisbet tranquilo, pessaque emd elo n'auras jamai rasou. Vau miei parlâ de quèu sendicat.

PITIT-JAN. — E bè veiqui : Quante lous oubriés sendicats an à se plagne de quaucarè s'en van troubâ lous bourgeois e lur disen : « Volem co d'aquí au volem co lai. » E si lous bourgeois troben que qu'ei trop d'afas e que poden pas zou balhâ; soun bè, tout parié, fourçats de se clinâ.

LISBET. — E n'autreis soun bè fourçats de nous clinâ devant notre einat qu'ei partit; mas, per moun armo, vous asseure que nous clinarem pas devant quèu petit eissoulent que s'élève las eipaules e que ris.

(La Lisbet cour sur lou Setième, lou balai à la mo, pessaque risio e s'élève las eipanlas quand sa mai parlavo. Lou drole s'enfu, trapo la porto e seurt.)

SCENO IV

SERVILHOU, LISBET, PIAROU, PIQUÈTO, PITIT-JAN

PIAROU. — E n'autreis qu'avem un pitit bè e que, Diu marce, lou trabalhem, à qui qu'ei que podem nous plagne si co vai pas, maisèi que soun bourgeois ?

PIQUÈTO. — O, à qui qu'ei que n'irem dire : La pleuio a nejat las poumas de terro, aubetout lou soulei a riclat lou pitit revengut ?

PITIT-JAN. — E quand lous ausèus venen becâ notras cireijas e notreis rasins ?

PIAROU. — E quand lous mounjetous soun cussounats ?

PIQUÈTO. — E quand las gissas soun charantounadas ?

PITIT-JAN. — Qu'ei pas lou tout : E quand lous mounjetous, las gissas e las nentillas ne cosen pas, qui qu'ei que n'en patis ?

SERVILHOU. — Ei bè plo segur que qu'ei n'autreis que soum lous prumiés plumats.

LISBET. — E quand vas à la fièro, v'autreis tous, e que passas votre tems à choupinâ, qui qu'ei que n'en patis ? Anè, parlas, qui qu'ei que n'en patis ? Anè, parlas, vèire ?

SERVILHOU. — E tu parlas bè prou per n'autreis.

LISBET. — O ! sabe plo que dices : ai acourdat un vesì au un camarado, e a bè fougut nâ fâ lou vinage ; mas dins quèu tems la fenno resto à la meijou e qu'ei velo que patis de tout mai que v'autreis. E bè n'ai prou, n'avem prou n'autras, las fennas, volem fâ coumo vous fas, volem mountâ un sendicat, nous òcuparem de tout ça que se passo dins lous ranvers e si, chas nous, lou toupì bulis pas, co sirò bè v'autreis, quete cop, que n'en patires.

SERVILHOU. — Mounto lou toun sendicat, ne mancavo noumas ce tout aurò, ai deijà trubat un noum que li nirò finamen : « Lou sendicat de las platussièras ».

LISBET (*en coulèro*). — O, lou mountarai ! o, lou mountarai !

PITIT-JAN. — Anè, ma Lisbet, anè, soum pas venguts vous vèire per nous afachâ. Soum venguts per fi d'adoubâ quèu famous sendicat. E, si co vous plas, l'apelarem lou « Sendicat dous Cussounats ». Tu, Piquèto, chanto nous la chansou que l'Armand (1) nous a boutado en musico.

PIQUÈTO (*chanto*)

LOUS CUSSOUNATS

N'autreis soum lous cussounats,
Lous cussounats de la terro,
E nous cherchem la manièro
De pas èsse trop sannats.

Recoursou

Sirem 'no troupelado
Quand farem l'acampado,
E per èsse pas mau menats,
Faran dêu brut lous cussounats.) *bis*

(1) Armand Tenant.

2^e COUPLET

N'autreis tous volem paia
Coumo se dèu notro talho;
Mas volem pas de la palho,
Sens gru, per notre soupà.

(Recoursou.)

3^e COUPLET

Si la pleuio nous purris,
Jous la terro, la recolto,
Nous volem barrà la porto
Au percetour qu'eissuris.

Recoursou

Sirem 'no troupelado
Quand farem l'acampado,
È per èsse pas mau menats,
Faran dòu brut lous cussounats. } *bis*

(tous creden) Bravo ! Bravo !

SERVILHOU. — Qu'ei, ma fè, bien brave tout acò; mas si paia
pas votro talho, qui paiairò ?

PITIT-JAN. — Qui paiairò, qui paiairò, e lous autreis sens douto.

SERVILHOU. — Lous autreis !... Sabèis-bè ça que co vòu dire ?...
Nou !... E bè co vòu dire : Mas que me damandas rè tout nirò
bien e lous autreis poden crebà, co m'ei 'gau. — E creses belèu
que n'i a noumas v'autreis que ses einuiats ? Ah ! mous droleis,
si voulias m'eicoutà, si voulias trabalhà, farias surti de quelo
terro meipresado dous tresors coumo ne s'en trobo en degun
lec de pariés.

SETIÈME *qu'èro, dempei un moumen, tournat rentré e qu'èro
restat rasis la porto, crèdo. — Eh ! veiqui moun frai e sa fenno
que venen ! (seurt e cour au davant d'is, e bien lèu Marsau e
sa fenno rentren. Marsau ei bilhat coumo un gouiat de la vilo
e Blasillo ei coueifado d'un chapèu).*

SCENO V

MARSAU, BLASILHO, SERVILHOU, LISBET, PIAROU, PIQUÈTO,
PITIT-JAN, SETIÈME

MARSAU. — Bounjour à v'autreis tous. (*Marsau e la Blasillo*)

van poutounà la Lisbet e Servilhou e balhen la poutado aus autreis.)

SERVILHOU. — E bè, qu'ei d'ou novèu de vous vèire güei. Vas, d'abord, trincâ em n'autreis. (*A sa fenno*) Lisbet, porto d'ous vèireis e d'ou vi. (*Se virant d'ou coutat de Setième*) Tu, Setième, aido ta mai.

SETIÈME (*boulego pas, pei vai parlâ à soun frai*).

LISBET (*vai quère lous vèireis, n'en porto quauqueis-us sur la taulo e se viro d'ou coutat de Setième e li dis*). — N'as pas auvit ça que t'a dit toun pai ? Anè, valèu m'eidâ. (*Setième boulego pas.*)

LISBET (*torno poutâ d'ous vèireis, vèu que Setième n'a pas boulegat, vai ad èu e li balho un chataurelhat, en dire*). — N'as belèu pas auvit ?... Mas pense qu'aurò z'as sentit.

SETIÈME. — Sei fatigat.

MARSAU. — E que qu'ei qu'as ?

SETIÈME. — Ai la treinasou. Minge bien, bève bien, deurme bien, fau bien mas necessitats, mas pòde pas trabalhâ.

PITIT-JAN. — E bè, qu'ei que ses un foutut fegnant.

SETIÈME (*en s'eicharni*). — Vous, co vous aregardo pas.

PITIT-JAN (*li balho un cop de ped dins las fessas*). — Tè, veiqui per garì ta treinasou. Qu'ei lou remèdi que te fau.

(*Setième eimalit, vai rasis lou cabinet, trapo uno bouteille e la laissez toumbâ per terro.*)

LISBET (*li balho un chataurelhat*). — Quèu foutut drôle, n'ei boun à rè.

SETIÈME. — Qu'ei per acò que vole rè fâ, e v'autreis, que sabes que sei boun à rè, me coumandas toujours d'ou trabaï maleisat.

SERVILHOU (*que ser à bèure*). — Anè, à v'otre santat !

(*beven e trinquen tous*).

PITIT-JAN. — Aurò qu'avem trincat, vam nâ pus louei coun-tuniâ notro virado.

SERVILHOU. — O, vas nâ vèire un pau si n'i a pas, emperaqui, d'autreis cussounats que voudran vous eidâ à platusseïà e fâ coumo lou Setième : rè d'ou tout. — Ah ! au lec de fâ trabalhâ votro lengo per toujours reclamâ co d'aquí mai lou resto, farias miei de fâ trabalhâ l'arai.

PITIT-JAN. — Mas qu'ei jurtamen ça que volem. Anè, adiussias. (*Seurten Pitit-Jan, Piquèto e Piarou.*)

SETIÈME (*à Pitit-Jan qu'ei enquèro sur lou bassouet*). — Au ! Pitit-Jan ! Au ! Pitit-Jan !

PITIT-JAN (*paro sa tête*). — Que qu'ei que i'a ?

SETIÈME. — Vène de trapâ un cussou qu'ei surtit de votro cervèlo.

PITIT-JAN (*li cour dessus*). — Foutut poullissounard.

(*Setième s'enfu. — Piquèto e Piarou, que soun tournats rentrâ, entraînen Pitit-Jan, que crèdo e s'eibrassèio.*)

SCENO VI

SERVILHOU, LISBET, SETIÈME, MARS AU, BLASILHO

(*Servilhou, Marsau e la Blasillo se soun sitats sur de las chadièras. Setième se sièto per terro e la Lisbet virouno.*)

MARS AU. — E bè, pai, aurò, que soum tous soulèis, vau vous dire perque iou sei vengut. — Sabes, parai, qu'ai massat uno bouno plaço ; sei bien paiat e sei plo content. Mas, en vilo, tout coto char : un bresou d'eiracèu, de sermignas au de vigneto, uno çabo, un paquet de rafeis, uno gausso, un chòu. uno pourado, tout se paio. Ai doun bajat que, si troubavo un pitit coumerce per la Blasillo co nous adoubarió. (*Se virant d'ou coutat de soun pai.*) Me coumprenes-bè, parai ?

SERVILHOU. — O plo, te coumprene, e belèu te coumprene trop. Countùnio.

MARS AU. — Leidoun sei vengut vous troubâ per vous dire que si vendias votre bè pourriam, em l'argent, achatâ un pitit coumerce e que pourrias tous treis veni restâ em n'autreis.

SETIÈME (*que se lèvo*). — Ah ! vole bien. Iou nirai me permenâ. (*Marcho e s'eibrassèio en se carrâ.*)



LISBET (à *Setième*). — O, eipèro co, niras te permenâ, faras lou Moussur ! Ah ! sabe plo que qu'ei lou meitiê qu'eimas lou mai, mas qu'ei lous utis que te manquen !

SETIÈME. — E mas, si fam un coumerce, co nous mancarò pas, maisei que lous sòus toumbaran tous lous jours dins la tireto.

MARSAU (à *soun frai*). — Anè, taiso-te, tu.

BLASILHO. — Counèisse, à rasis de chas nous, une pito auberjo e 'no boutico, ante venden dòus ligous, de las gulhas e dòus berlingaus, que farió bien, m'ei deivis, notre afâ.

SETIÈME. — Pènsè bè que ca farió notre afâ ! D'abord, si vendes pas lous berlingaus, iou lous minjarai.

LISBET (s'*eibrasseiant*). — Quèu drole m'afouliro, per moun armo.

MARSAU. — E bè, pai, que dises d'acò ?

SERVILHOU (qu'a *clinat lou chai dempei un moumen*) se lèvo e *dis* : N'en dise..., n'en dise... Ah ! moun paubre drole, co me deiviro la tète e sabe pas que n'en pensâ !

MARSAU. — E bè, segues-nous !

SERVILHOU.

Volèis que parte, que m'en ane,
Que te sègue dins ta preijou,
Ante fourrò, pamens, qu'afane
Ma vito louei de ma meijou !
Volèis que quite notro terro
Ante notreis vieis an vicuts ?
La vielho terro nurricièro
E la meijou an sei nacut ?
E per que fâ, te zou damande :
Per nâ dins la vilo, au relus,
Trucâ mon cèu bluiaud e cande
Countre un granié per tout orlus...
Nou, nou, qu'ei qui la bouno vito
E tu te troumpas, moun pitit.
La vilo n'ei pas l'eicapito,
Eici tout ei clar, deicoutit,
E siau la vito se deibojo :
Per oreloge ai lou soulei,
E chaque jour mai-que-mai frojo
L'amour prigound qu'ai per mous vièis.
Coumo is, ma darnièro badado
S'envoularò d'eici, chas nous,

E ma darnièro retirado
Sirò qui près, ante soun tous.

(Après avei parlat, se siètò e resto pensatiu.)

MARSAU. — Mas vèire, pai, fau pas entau vous afouli. Sires, n'en sei segur, urous e countent demei n'autreis; e perdres rè en quità quello terro que vous eireno, que bèu votro susour e que l'orro marastro ei suçarèlo de votre sang.

SERVILHOU. — Ei suçarèlo de moun sang, disèis-tu ? Ah ! moun paubre drole, coumo te troumpas ! Qu'ei velo, qu'ei quello terro beneisido, que me vè de mous vièis, que me balho forço e santat e, de mai, me balho l'òunour ! N'i a pas de plaço, m'auvèis-tu, n'i a pas de meitié, n'i a rè que siaie pus bèu e qu'einaute tan un òme que lou trabai de la terro.

MARSAU. — O, quand un a bien penat, de l'enmati jusqu'à l'ensei, e qu'un terno chas si en treïnassant las chambas, qu'un ei cubert de fagno e de susours, vèse pas bien ante vas querre lou grand òunour !

SERVILHOU.

O, pitit, qu'ei 'n òunour de trabalhâ la terro
E de magnâ l'arai que deiviro lou sòu
Per fi de semenâ dins la grandò bladièro
Lou froument nurricié d'un mounde de tras fòus.
Tras fòus d'abandounâ la risènto campagno
E l'er sansié, grand medeci d'ou fege blanc,
Tras fòus de nâ trucâ notro glouriuso fagno
Per l'eitufit, e la pouvero, e lou relan.
Qu'ei de notre trabai que la grandò redoundo
Nurris tous sous efants. N'autreis soum lou froujous
Teti de l'univers qu'eicampèlo à la roundo
La sabo avivarèlo e sano d'ous terrous.
Coumo un crane soudart se bat per la plumacho,
Trabalhem n'autreis tous per l'amour d'ou païs
E qu'ei lou grand òunour d'acoumpli quello tacho
Que me fai te credâ : « Ne vole pas parti ! »

MARSAU. — E bè, pai, coumo vourres, nous vam entournâ e nous adoubarem tous soulèis. La Blasilho se loujarò si fau; mas vous asseure enquèro que vous aves tort.

BLASILHO. — Vèire, pai, eicoutas Marsau, venes em n'autreis.

LISBET. — Vendre notre bè, qu'ei pas eïsat. Que n'en disèis-tu, Servilhou ? M'ei deïvis que iou saubriò tabè fâ la damo (soulèvo sous coutilhous e marchò en se carrâ). E, ma fè, si volèis, partirai em forço plasei.

SETIÈME. — O, pai, fau parti, fau sègre Marsau.

SERVILHOU. — Partes, mous droleis, tournas à la vilo, tournas vous rivà à la jarro lou boulet que treinas, anas vous en. Iou reste qui, sei lou gardian de notre bè, de votre bè, mous droleis. Vous lou vole gardâ. E quand, pus tard, mai belèu co tarzà pas, vourres tournâ eici, vous landarai lou grand pourtau e troubares moun cor toujours drubert.

MARSAU. — E bè, nous en vam.

BLASILHO. — Bounjour pai, bounjour mai, adiu Setième. (*Se poutounen tous e s'en van; lou Setième lous seg jurquo dins la basso-cour. Servilhou se sièto pensatiu.*)

MARSAU (*dòu bassouei se viro e torno dire*) : Adiussias.

SERVILHOU (*tristamen*). — Adiussias.

SCENO VII

SERVILHOU, LISBET

SERVILHOU (*qu'ei nat rasis la porto e que lous aipio s'en anâ*). — Qu'ei bè dous us cops dur d'acoumpli soun devei, qu'ei rede de vèire parti soun fi. Ah ! paubre drole, si vòlio m'eicoutâ (*s'eisseujo lous eis em l'eiquinto de sa belouso*). Nou, nou, n'i a rè à fâ. — Lou tems, lou tems soulet qu'adobo tout, z'adoubarò. (*A la Lisbet que l'eicouto lou chai clinat, la larmo à l'ei — roundamen*) :

Anè, qu'ei prou parlat, pren toun panié e vam nâ trabalhâ.

(*Seurten tous dous.*)

RIDEU

SEGOUND ATE

(Memo chambro qu'au prumié ate. Uno bresso. Dins quello bresso uno bubôio que tè la plaço d'un meinajou. A coutat de la bresso, e la calinant, la Blasillo. La Lisbet brocho un debas e ei sietado).

SCENO I

LISBET, BLASILHO

BLASILHO (*chanto tout en bressâ lou droulichou*)

NINAIRO

(*Musico de Raoul Chatèu.*)

1^{er} COUPLET

Sur lous linçelous de sa bresso,
Quand au teti s'ei sadoulât,
Tout haveious de crêmo eipeço,
Qu'un pau pertout a regoulât,
Lou drole ei tout eivedelat.

Recoursou

E la mai douçamen chantouno,
Tout en bressâ lou droulichou,
Soum, soum, fai toun soum, ma ratouno,
Soum, soum, fai toun soum, moun pitiou,
Car l'orro mouno
Qu'eici virouno
Empourtariô moun gouiassou.
Soum, soum, fai toun soum, moun pitiou.

2^e COUPLET

Em sas jambetas fai la telo,
S'eissâio à bisâ sous penous,
Uflant sas jautas coumo velo,
Semblo que vai bufâ las pous,
Mas viro sens dessur dejous.

(*Reconsou.*)

3° COUPLET

Ramajant tau qu'uno lauveto,
Chasso lou soum que vòu veni,
E ta rede qu'uno lumeto
Fai s'einautâ soun embouni
En eissaïant de s'eicharni.

(*Recoursou.*)

4° COUPLET

Charjat à n'en boumbâ lou rable,
Veiqui l'ome tan eiperat :
Lou tarrible marchand de sable.
E, bien lèu, notre pitit rat
S'endeur em lous dous pouengs barrats.

(*Recoursou.*)

BLASILHO (*a chabat de chantâ. Avant qu'àie chabat, Servilhou rentro siau en marchâ sur la pouncho dous peds.*)

SCENO II

LISBET, BLASILHO, SERVILHOU

SERVILHOU (*s'aprêcho de la bresso, aipio lou droulichou que deur e dis tout siau*) : Fau que passan la bresso de lai, pessaque lous vesis e lous droleis van ribâ, faran dôn brut e lou gouiassou s'eivelhariô. — Aïdo-me. (*Servilhou e Blasilho emporten la bresso.*)

SCENO III

LISBET. — Ei mignard coumo uno senzillo, quèu droulichou ! Servilhou a gut rasou de cousservâ soun bè e lous droleis soun countents de lou tournâ troubâ. Mas z'i dirai segur pas ! S'en carrariô trop... Lous omeis an bè dous us cops rasou, sens douto, mas fau jamai zou lur dire. (*Blasilho e Servilhou tornen rentrâ.*)

SCENO IV

BLASILHO, SERVILHOU, LISBET

BLASILHO. — Enfin, lou drole deur.

SERVILHOU. — E deur tranquile.

LISBET. — Leissas-me nâ vèire si s'eivelho pas (*Lisbet seurt*).

SCENO V

SERVILHOU, BLASILHO

BLASILHO. — Ah ! pai, coumo es bien fait de nous cousservâ votre bè. E coumo n'autreis soum urous d'esse tournats. E coumo vous granmârcie.

SERVILHOU. — Qu'ei iou, pito, que dève vous granmarciâ à tu e à toun ome. D'abord, m'es pourtat quèu droulichou, prumié rai de soulei dins notro vielho meijou qu'èro pas gâio, te zòu proumète, dempei qu'eras partits. E, de mai, votro tournado a fait talamen de bè à notre Setième, quèu drole que voulio rè fâ, qu'aurò seg soun frai coumo soun oumbro e trabalho à plèis bras.

BLASILHO (*qu'a l'er d'eicoutâ dòu brut deforo*). — Co d'aquí qu'ei plo vrai ! Mas m'ei deivis que qu'ei vis que tornen (*vai à la porto, aipio deforo e dis*) : O, qu'ei vis.

SERVILHOU. — Fai lur sinne de fâ tout siau per fi de pas eivelhâ lou droulichou.

BLASILHO (*sur lou bassouei, lur fai sinne em soun bras de marchâ tout siau*). — *Marsau e Setième rentren en marchâ sur la pouncho dous peds. Soun en coustume de trabai e porten chacun un uti.*

SCENO VI

BLASILHO, SERVILHOU, MARSAU, SETIÈME

MARSAU (*tout siau*). — E bè, quèu drole deur ? (*se lavo las mas à la couado*).

BLASILHO. — O, a chabat per s'endurmî, mai co n'a pas eitat eïsat.

SETIÈME. — A lou diable dins la peteïrolo moun nebout, tè de soun toutoun.

SERVILHOU. — Mas, Diu marce, te ses adoubat e qu'ei lou Marsau que n'ei la causo (*Lisbet rentro*).

SCENO VII

LISBET, BLASILHO, SERVILHOU, MARSAU, SETIÈME

LISBET. — N'es pus besoun de parlâ tout siau. Lou drole deur e pourrias fâ petâ tous lous canous dou païs que s'eivelharió bri.

MARSAU (*à Servilhou*). — E bè, pai, poudes nâ vèire votro terro dôu Derot, la recouneîtres pus; aurò que l'ai eiboueijado ei ta neto qu'uno solo de batasous.

SERVILHOU. — Ah ! Diu marce, ses tournat au boun moumen. Ne poudio pus li tène.

LISBET. — Eh ! mous droleis, iou èro coumo Servilhou, tout à fet eirenado.

MARSAU. — Mas, aurò, soum qui. Ah ! veses-vous, quand, l'anado darnièro, venguis per fi de vous fâ vèndre votre bè, crèsio bien fâ. Mas, Diu marce, moun pai l'a vis pus clar que iou.

BLASILHO. — O, àvio coumpreis qu'en vilo tout n'ei pas miau e que lous grus de sable manquen pas dins l'òli òulivadour de las deibojas de la vito.

MARSAU. — Quand tournis prène ma plaço, tout anè bien; mas Blasilho fuguet groulaudo, lou droulichou ribet e fouguet paia per fâ bujadâ lous quiteis bourrassous. Prenguis 'no fenno de journado, mas la net lou drole me ténio eivelhat e, ma fè, n'èro pas fier l'enmati per nâ trabalhâ. L'ai tengut tout parié jusqu'au jour que, à moun tour, fuguis trapat per n'erpêço de foutut mau que cour que me boutet à rè.

BLASILHO. — Ah ! moun paubre drole, fau pus bajâ à tout acò. Nous soum bè prou carsinats : aurò qu'ei chabat.

SERVILHOU. — O, qu'ei chabat per notre bounur à tous !

SETIÈME. — E per lou mèu tabè. Moun frai, lou Marsau, en teurnâ eici, a fait petâ lou lian barutelaire que m'envertoulhavo.

MARSAU. — Anè, qu'ei pas lou tout, sables que lous vesis van veni passâ la serenado em nous per fi de feitejà ma revirado eici. Fau doun teut agalhâ. (*La Lisbet trapo lou balai e boten dôus vèireis e de las sietas sur la taulo.*)

(*à quèu moumen, auven chantâ dins la basso-cour.*)

Sirem 'no troupelado
Quand farem l'acampado,

E per pas êsse mau menats)
Faran dôu brut lous cussounats.) *bis*

(*Marsau dreubo la porto e entren : Pitit-Jan,
Piarou e Piquêto.*)

SCENO VIII

SERVLHOU, LISBET, MARSAU, BLASILHO, SETIÈME, PITIT-JAN,
PIAROU, PIQUÊTO

PITIT-JAN, PIAROU, PIQUÊTO (*lèven lous bras e creden*) : Adius-
sias à tout lou mounde (*se balhen la pourtado*).

PITIT-JAN (*à Marsau*). — T'eiperaven, Marsau, per te balhâ la
presidênso dôus Cussounats e, aurô que ses tournat, te vam
nounmâ.

MARSAU. — E mas, mous amis, si lou cussou m'a trabalhat,
aurô me laisso bien tranquile. Sei tournat à la terro e, vese-
vous, per que tout anc bien, fau eimâ la terro.

PITIT-JAN. — Eimas la terro ! Mas, per moun armo, nous l'ai-
mem tous e qu'ei per elo que volem fâ notre sendicat.

MARSAU. — E bè, maisei que l'eimas tan, coumo co se fai qu'ei
matî, quante sei nat labourâ notro bladiêro, qu'êro restado en
ratoulho dempei dous ans pessaque moun paî ne poudio pus,
soulet, passâ pertout, ai vis ta vigno deicimado per la meichanto
erbo, ai vis la terro feçido de tranujo e d'erboulouei e lou plai
de toun prat envertoulhat de rounzeis e de gitous gourmands
que lou mingên ?

LISBET. — Fau bè que tout lou mounde vive !

BLASILHO. — Anè, si voules trincâ aprechas-vous. Ai preitit,
per vous, dôus patissous. Sietas-vous e goustas-lous. (*Tout lou
mounde se siêto; mas Lisbet e Blasilho se sieten pas, van e venen.
Minjen dôus patissous, trinquen.*)

SETIÈME (*se lève e vai rasis de Pitit-Jan, pei fai semblant de
li tirâ un cussou de la cervêlo*). — Tè, moun Pitit-Jan, veiqui
'n autre cussou ! Mas, lou diable m'empört, n'es lou chai feçit.

PITIT-JAN. — Taiso-te, fegnantard que ses. Ah ! tu n'as bri
chanjat.

SERVILHOU. — E si plo a chanjat, e lou cussou de la flemanza que lou bretavo a, Diu marce, disparegut.

MARSAU. — Qu'ei l'amour d'ou terradou qu'a tuat soun cussou.

PITIT-JAN (*à Piqueto e à Piarou*). — Coumo troubas co d'aqui, vous autres ? Marsau qu'a l'er de dire qu'aimen pas notro terro !

MARSAU. — Ah ! veseis-tu, quand un aimo la terro, un la trabalho. Eicouto quello chansou.

LA TERRO MAIRALO

(*Musico de Raoul Chatèu.*)

1^{er} COUPLET

Un viei pepè à tète blanchou,
Au nas toucant lou babignou
Sietat sur un bouci de plancho
Que dous piquéis fan un banchou,
Lous treis quarts d'ou tems reibassavo
A sa jounesso, à sous vint ans,
E disio, quand l'ensei menavo
A soun entour tous sous efants :

Recoursou

Eimas votro terro mairalo
Nurricièro de votreis grands,
Cop de bigot e cop de palo
Soun lous bisous que mai li van,
Cop de bigot e cop de palo
Soun lous bisous que mai li van,
Eimas votro terro mairalo.
Eimas-la toujours, mous efants.

2^e COUPLET

Ai plo vis mai d'un camarado
Abandonnâ notre viei sôu,
Leissant qui lou soulei, la prado,
Lous rouladis d'ou roussignôu
E lou grand arçeu que rè cacho,
Ni chaminèio, ni preijou,
Per nâ dins la vilo, à l'eitacho,
Alenâ un er de poueisou.

(*Recoursou.*)

3° COUPLET

En lai, d'autreis an fait fourtuno,
Pamens, mai-que-mai coubeitous,
Bè que se passan uno à uno
Lurs envejas, soun pas urous.
Quand an co qui, volen lou resto,
Quand an lou resto, volen mai;
Tout per is passant à la lesto
Lou bounur s'arreito jamai.

(*Recoursou.*)

4° COUPLET

Eici, dòu mens, à la campagno,
Un s'eniuro de libertat,
Qu'ei pas, Diu marce, lou que magno
Lou mai d'or qu'a mai de santat.
La tète n'ei pas 'no machino
Que bur dòu mati à l'ensei;
E si souvent boumbem l'eichino
Ne lipem jamai lous artèis.

Recoursou

Eimas votro terro rairalo
Nurricièro de votreis grands.
Cop de bigot e cop de palo
Soun lous bisous que mai li van,
Cop de bigot e cop de palo
Soun lous bisous que mai li van.
Eimas votro terro mairalo.
Eimas-la toujours, mous efants.

PITIT-JAN. — As rasou, as rasou. Mas coumo co se fai que ses
partit d'eici ? Te ses trompat, tu tabè.

MARSAU. — O, me sei troumpat !

SERVILHOU. — Tout lou mounde pod se troumpâ. E v'autreis
vous troumpas tabè en nâ courre un pau pertout, en abandounâ
votre trabaï e en leissâ s'engreissâ votre cussou.

MARSAU

Droleis. si m'en sei nat, qu'ei que ne sàbio bri
Ça qu'un trobo lai loun. — Aurò sei bien garit.
En vilo, qu'ei plo vrai, la journado qu'un gagno
Ei pus forto que la qu'un toco à la campagno,
Mas si sabias, tabè, coumo tout ei pus char
E coumo lou boursi, sens trop fâ lou flambard,

Devè vite clabot. Ah ! la telo d'eiragno
Ne s'eicampèlo pas sur lous gros sòus qu'un magno
Preque à tout pas moumen per co qui, per co lai.
Tout s'achato, e 'no quito flour de meis de mai,
Qu'eici se trobo à plè brassat, là-bas se pàio :
L'un pàio l'aigo, l'er, e quello vielho talho,
Que cresias entarrado e morto per de boun,
Chaque jour, mai-que-mai, revicolo lai loun.
En vilo, ei belèu miei coupat lou sens-culoto,
La blaudo de la fenno ei belèu pus risoto
E lous souliés lusissen mai que notreis soucs;
La chamiso mens rufo ei mouflo coumo pous,
E quand un seurt, qu'un se permèno, un porto cano;
N'i a memo, en se carrà, que porten cano e bano.
Tout lou mounde a l'er riche, e lous que zòu soun pas
Deipensen belèu mai, fan de pus fis repas.
Mas ça qu'en vilo troben pas, ça que li manco :
Qu'ei lou boun er, lou lum, lou souleil que baranco
Qu'ei quello vito larjo e quello libertat
Qu'aves à la campagno e que fan sa bèutat.

SERVILHOU. — A bè qui, moun pitit, as prou virouneiat, mas
la tenèis la routo, la bouno routo an vas, enfin, chaminà libra-
men per toun bè e per lou bè de notro meijounado.

MARSAU. — Ah ! veses-vous, la vilo m'eitoufavo, m'èro deivis
qu'àvio. per bordecoù, un sedou que barravo en dedins touto
ma bouno imour.

BLASILHO. — Ne parlavo preque pus e iou migravo. Avio pòu
qu'un jour vèu devenguèsse mud.

LISBET. — Nou, co se pouidio pas. N'avias noumas besoun de
bajà que Marsau ei moun drole e, Diu marce, n'i a jamai gut de
muds dins ma familho ! (*A quèu moumen, rentro Jantou, a l'er
d'avei courgut e crèdo*) :

SCENO IX

JANTOU. — Lou cussou ! Lou cussou !

PIAROU, PIQUÈTO, PITIT-JAN. — E bè, que i'a ?

JANTOU. — I'a ! que lou cussou se permèno.

JANTOU

LA BALADO DOU CUSSOU

Lou cussou, dins votro cabacho,
Un bèu mati a fait soun nai

E de quèu jour, labouro, piocho,
Deiviro qui, deiviro lai,
S'arrèito bri dins soun trabai.
Votro cercèlo, coumo pocho
Qu'ei deivirado mai-que-mai,
Coulo dirias l'aigo de rocho.

Lou cussou fai d'abord 'no cocho
Per fi de li passâ lou chai,
E, coumo tout siau brocho e brocho
Fan lou fagot, em soun tarrai,
Fai de la cervèlo un curai.
E la cabocho, touto flocho,
Que n'a pus rè dins lou pansai,
Dindino que dirias 'no clocho.

Lou cussou n'a bri de malhocho,
Ni de courdilhou, ni d'encai,
Ni de chandèlo que se mocho
Per l'eicleirâ dins ça que fai;
D'utis ne porto pas soun fai.
Soum tarrai, fi coumo uno locho,
Trauco l'osso coumo lou grai
E se sadolo e fai bambocho.

Mandadis

Prince Cussou, ses 'n orre jai !
Masso d'abord quello talocho,
E que te vesam pus jamai,
Car tu trabalhas coumo un Bocho !

SETIÈME. — As rasou, Jantou. Fau lous tuâ lous cussous
(*s'aprècho de Pitit-Jan e fai semblant de n'en tirâ un de sa
cervèlo*). Tè, n'en veiqui un brave ! (*fai semblant de lou pensâ
per terro, li boto lou ped dessus e dis*) : Un bocho de mens.

PIAROU (*s'aprechant de Jantou*). — Enfin, que ses-tu vengut
fâ eici, fas pas partido dôus Cussounats ?

JANTOU. — E nou; mas, qu'ei ta fenno, la Roussilho, qu'a tra-
pat lou cussou. Ei partido : veiqui ça que sei vengut te dire.

PIAROU. — Que disèis-tu qui ! Ses fôu ! Notro fenno ei par-
tido... e per ante nâ ?

JANTOU. — A fait un balot de tous sous afas e m'a dit : Jan-
tou, diras à Piarou que m'entorne chas nous. Vole pus damourâ
emd un ome que ne fai rè noumas s'ôucupâ dôus Cussounats
e que laisso tout eici à l'abandou.

PIAROU. — Coutro de coutro ! Notro fenno ei partido ?... Mas,

ercusas (*se virant d'ou coutat de Pitit-Jan*), vas me paia. — Sei cussounat, e avem counvegut que nous partajariam las pertas.

PITIT-JAN. — E è, moun viei, si ses cussounat, ta pretenciù, elo, z'ei pas cussounado. Las fennas coumten pas.

LISBET (*li cour dessus*). — Que disèis-tu ? Las fennas coumten pas ? Ne coumten noumas per fâ votras chambarièras, parai ?

BLASILHO. — Anè, mai, teisas-vous.

LISBET. — Me taise, mas lou mountarai lou sendicat de las fennas !

PITIT-JAN. — E bè, per moun armo, mancavo noumas co.

SERVILHOU. — Vous z'avio bè dit, mous droleis, lou melhour d'ous sendicats, sens lou travail, vau rè.

PITIT-JAN. — E bè ! per ma fè, Servilhou, crèse qu'aves rasou !

SERVILHOU. — E iou n'en sei segur qu'ai rasou. — Quis cussous fau lous tuâ. Tout n'ei pas perdut, mas ei tems de s'i trapâ. Leissas qui touto la parladuro e boutas-vous à la besougno. N'es doun pas coumpreis que lou mau que cour qu'ei lou cussou : lou cussou que breto lous chais e que, si co duravo, fàrio d'ou bren de l'eime lou pus sancie e lou pus tras-lusent. Lou cussou que vous dis : N'i a pus besoun de trabalhâ per èsse urous. Lou cussou que vous entraupo e que vous fai bajâ à l'ideau de la perfeciu. Paubreis droleis, la perfeciu n'ei pas de quete mounde. Lou travail, qu'ei notre sauvadour. Lous reireis an trabalhât, notreis pais an trabalhât e n'autreis trabalharem ! — E si trabalhèm pas, crebarem !

(*Tous ensemble* : Servilhou, es rasou !

LISBET. — E bè ! davant tous v'autreis, dise, iou tabè, que Servilhou a rasou. E sabes, supendent, que sei pas uno flaugnardo. (*Se virant d'ou coutat de Servilhou*) : O, Servilhou, as rasou. As rasou e te vole poutounâ. (*Lisbet poutouno Servilhou*).

(*Tous ensemble*) : Bravo ! Bravo !

PITIT-JAN. — Ne tournarem parlâ d'ous cussounats rè noumas quante veirem sur notre terras, eiboueijadas e femadas coumo se dèu, froujà à pieno sabo lou gros e lou pitit revengut.

PIAROU. — E iou vau nâ querre notre fenno que tournarò, n'en sei segur, aurò que vau trabalhâ.

SERVILHOU. — E tu, Marsau, chanto nous ta chansou dòu trabalhador.

MARSAU (*chanto*)

LOU TRABALHADOR

1^{er} COUPLET

Lou que trabalho notro terro
Au lou que forjo lous utis
Soun lous pus bous chasso-misèro
Car soulèis saben la buti.

Recoursou

Lou trabai chasso la marano,
Lou trabai qu'ei lou porto-grano
Dòu bounur e de la santat,
Lou trabai balho òunour e libertat
Dòu que trabalho,
Lou meichant sort
Toco bri talho,
Vivo lou Perigord !

2^e COUPLET

Nous soum de la grandò redoundo
Lous pais nurriciés de toujours,
E sens pauso, jurqu'à la boundo,
Devem couflà lou saladour.

(*Recoursou.*)

3^e COUPLET

Droleis, fau jurà sur la tète
De notro bouno mai à tous,
De deivirà la mèndro mièto
De notre brave terradou.

Recoursou

Lou trabai chasso la marano
Lou trabai qu'ei lou porto-grano
Dòu bounur e de la santat,
Lou trabai balho òunour e libertat.
Dòu que trabalho,
Lou meichant sort
Toco bri talho,
Vivo lou Perigord !

(QU'EI CHABAT).



L'ERBO FÔLO

Iou naïme pas ça qu'eï pe - na - ble E ne
sa - be bri que chòu-si, Lou tra - bai de terro èi guissa-ble E lou sou-
lei fai ne-gre-si, E lou sou-lei fai ne-gre - si. Sei pa mens
sou-biat de l'ei - co - lo, De las lei - gous e d'ous de - vèis, De las lei -
gous e d'ous de - vèis. Iou vou-drio coumo l'er-bo fo... lo Pou-
dei frou - jâ en de - le - sei, Iou ... vou-drio coumo l'er-bo
fo - lo Pou-dei frou - jâ en de - le - sei.

QUI LI POURTARO LOU DINÂ ?

Qui li pour-ta - rò lou di - nâ, Qui li pour-
ta - rò lou di - nâ Au bou-ié de Lou-ra-do E
pin e pan e ra pa ta pan qu bouié de Lou-ra - do ?

LOUS CUSSOUNATS

N'au-treis soum lous cus-sou - nats, 'Lous cus-
sou-nats de la ter - ro, E nous cherchem la ma - niè-ro De pas

Refrain

ès - se trop san - nata . Si - rem 'no trou - pe -
 la - do Quand fa - rem l'a - cam - pa - do, E per ès - se pas mau ine-
 nats, Fa - ran d'ou brut lous cussou - nats, E per ès - se pas mau ine.
 nats, Fa - ran d'ou brut lous cussou - nats.

NINAIRO

Paroles
 de Roubert **BENOIT**

Musico
 de Raoul **CHATEAU**

Sur lous lin - se - lous de sa bres - so,
 Quand au te - ti s'ei sa - dou - lat, Tout ba - ve -
 ious de cre - mo ei - pe - ço, Qu'un pau per - tout a
 re - gou - lat, Lou droie ei tout ei - ve - de - lat.
Recoursou
 E la mai dou - ça - men chan - tou - no, Tout en
 bres - sâ lou drou - li - chou: Soum, soum, fai toun...
 soum, ma ra - tou - no, Soum, soum, fai toun... soum, moun pi-
 tiou, Car l'or - ro mou no Qu'ei - ci vi - rou ... no
 Em - pour - la - rio moun... goui - às - sou. Soum, soum,



LA TERRO MAIRALO

Parôulas
de Roubert BENOIT

Musico
de Raoul CHATEAU

Mouvement de Marche Modérato

mf Un viei pe - pe - a tè - to

blan-cho, Oû nas tou - cant leu ba - bi - gnou Sie - tat

sur un bou - ci de plan - cho Que dous yi - quês fan un ban -

chou, Lous trêis quarts d'ou tems rei - bas - sa - vo A sa

jôu - nesso à sous vint ans, E di - sié quand l'ensei me -

Recoursou
na - vo A soun en - tour lous ses e - fants Ei -

mas vo - tro fer - ro mai - ra - lo Nur - ri - ciè - ro de vo - treis

grands, Cop de bi - got e cop de pa lo Soun lous bi -

sous que mai li van Cop de bi - got e cop de

pa - lo soun lous bi - sous que mai li van Ei -

mas vo - tro ter - ro mai - ra - lo, Ei - mas - la

tou - jour, mous e - fants

LOU TRABALHADOUR

Lou que tra ba Cho no-tro
 ter-ro Ou lou que for.....jo lous u - tis..... Souñ lous pus
 bous..... chas-so-mi - sè.....ro Car sou - leïs
Refrain
 sa.....ben la bu - ti. Lou tra-bai chas.....so la ma-
 ra - no Lou tra-bai, qu'ei..... lou por-to-
 gra - no Dôu bou-nur e..... de la san-
 tat..... Lou tra-bai ba - ho où-nour e li - ber-
 tat Dôu que in - bal-ho Lou mei-chant sort Tô - so bri
 to-ho Vivo lou Pe - ri - gord!

B.P.

Table des Matières



	Pages
Préface	III
I. Lou Fer à chavau	3
II. Mo de fer, mito de rounzeis	33
III. Clautrucat	57
IV. L'Amour déicimo tout	73
V. La Terro nurricièro	105
VI. Lous pas bilous	129
VII. Lous Cussounats	161



